



Selasa, 21 Pebruari 2023

Ogen: Kejadin 21:1-8



Ngaloken Pasu-Pasu



Adi erjujung bahan min lanamna, bage nina orang tua ngerana. Lanam fungsina gelah sangana kita erjujung lit si nahan beban simanjunggen ndai gelah ula tandes ku takalta, erbahan mesui ras la terbaba. Secara kiasen pengertin adi erjujung bahan min lanamna, gelah kita mempersiapkan diri guna bas ndalani kegeluhen e. Kita perlu mpersiapkan diri i bas kerina situasi, subuk bas ngaloken perbeben si la bagi ukur bagepe i bas ngaloken pasu-pasu Tuhan. Harus sipastikan maka ngasup kita ngaloken pasu-pasu e gelah ola dungna pasu-pasu Tuhan e ngena ateta, tapi si merekenca la ateta bage.

Memang tuhu adi pasu-pasu e arus kita ertima. Lit si lampas jumpa, lit ka si melawen. Bas ndekah nimai jawaben doa ntah pe pasu-pasu Tuhan e mbue kal kesabaren ras kinitekenta iuji. Bagi Sara si nimai lebih 25 mulai kin Tuhan erpadan mereken kesusuren man Abraham. Nimai i bas kurun waktu bagenda labo menukah, apai ka Sara enggo memasuki masa ija sekalak diberu ikataken lanai banci mupus; la masuk akal. Tapi kalak si nimai pasu-pasu Tuhan la banci mengandalkan pikiran kemanusiaanta saja. Kita harus mere ingan bas pusuhta ija Dibata erdahin alu kuasaNa. Gia melawen, gia tempa lanai mungkin, tapi la kap lit si metahat i bas Tuhan. Kitab pengerana ngatakenca, *ia nge si mereken kai pe ibas paksa si payo. Ia nge si mereken man banta kerincuhen guna meteh warinta si pepagi, pati la pernah iberekenNa man banta kepuassen lako ngertiken perbahanenNa*. Ertina alu kata sideban Tuhan ngenca ngetehsa kai ras ndigan pasu-pasu e payo iberekenna man banta. Tugas ta emekap tetap mindo ras erpengarapen, janah sembari kita nimai sipupuk kesabaren ras sipergunakan waktu nimai e alu ndahiken dahin si mehuli.

Tuhan enggo nikapken si perlu man banta, kita tading mpercayaken geluhta bas tanna. Bagi Sara si kedungenna ermalem ate sebab siitima-timai e reh nge. Tetaplah ngataken bujur man Tuhan ras geluhken kegeluhenta alu biak kalak si ngaloken pasu-pasu Tuhan. Sabar, tenang ras erpengarapen.